

**30 SEPTEMBRIE**  
**RUGACIUNEA 2**  
**SF.CUVIOS**  
**GRIGORIE DE LA PELSMA**

**Молитва вторая**

О добрый наш пастырю и богомудрый наставниче, преподобне отче Григорие! Услыши нас молящихся тебе и призывающих в помощь скорое предстательство Твое. Виждь нас грешных в толиках обстояниих сущих, виждь нас немощных отовсюду уловляемых и всякаго блага лишенных, и умом от малодушия помраченных. Потщися, угодниче Божий, не оставити нас во греховнем плену быти, да не будем в радость врагом нашим и не умрем в лукавых деяниих наших. Моли о нас недостойных Спаса Господа, Емуже ты со безплотными лики предстоиши. Милостива к нам сотвори Содетеля нашего в нынешнем веце и в будущем, да не воздаст нам по делом нашим и по нечистоте сердец наших, но по Своей, благодати да воздаст нам. На твое бо ходатайство уповающе, твоим предстательством хвалимся, твое заступление на помощь призываем, и к

цельбоносному гробу твоему припадающе  
недостойнии, изцеления просим. Избави нас,  
угодниче Христов, от злых, находящихся на ны, и  
укроти волны страстей и бед востающих на нас,  
да ради святых твоих молитв не обымет нас  
напасть, и не погрязем в пучине греховней и в  
тине страстей наших. Моли, преподобне отче  
наш Григорие, Христа Бога нашего, да подаст  
нам мирное. жительство, оставление грехов и  
душам нашим спасение и велию милость, ныне  
и во веки веков. Аминь.